

史臣曰先是兩司將此意論執累月迨未蒙允故三公來啓亦不得請而退是時內而文定王后以國母專制斷之權外而尹元衡以元舅挾衛社之功深懷舊憾遂起大獄斬伐士林毒縉紳自知其惡積罪盈必有天誅乃欲媚佛而求福凡所以崇奉之者無所不至此其意豈但愚惑而陷溺而已朝廷欲以區區口舌爭之其可得乎嗚呼既知為惡之得禍則曷若為善而得福拂輿情而奉異教舉一國聽命於佛以冀轉禍而為福天果可欺乎佛果有力乎

○日暈夜異方南方如火氣

已酉兩司再啓李芑事不允

庚戌 上御書講說經安遜曰慶尚道豐基郡有紹修書院高

麗人安裕之故居也

裕初名珣竹溪人有學行竹溪今屬豐基郡同知事周世鵬為郡守日立祠其地又

定書院於其側今儒生聚學焉

一道儒生濟濟相聚如朱文公之白鹿洞有志

之士欲博覽諸書而窮鄉下邑簡策稀罕必貽有志之嘆請於

印冊之時各頒一件